

I JÒRNA

*Iu, a-Ttia
nunn'è o-spissu ca Ti cièrcu
e...mi ni lori
ma u stissu
se-Tti viru Ti canùsciu
unu...umanu ri vicinu
pillirinu sthrati sthrati
rrè e-mmischinu
pastùri ri gghiènti
e r'aggnidhùzzi spièrsi a-mmiènzù ê spini ciùsi ciùsi*

*e-ttrinu
criru...ddhivinu ri luntànu
siminaturi ri spranzi
e-ccirnituri ri l'armi
siculi...senza luci senza firi...*

...e Ddhiu viri ...e Ddhiu pruviri...

*...e ri quannu
ri cielu s'arurnau ssa rutta
unni nascisTi
Figghiu ri l'Uomu
Gghiasuzzu ntê vrazza ri Maria
ppi nnui – ri tannu – supr'â terra è ffesta
e-ddhintr'ò cori
ssu juornu spiciali
vicinu e lluntanu
èni
u juòrnu santu rô Natali*

*...e ri quannu
Figghiu ri Ddhiu
Cristu, marturiatu 'n cruci
ri la morti
rrisuscitàsTi 'n gloria - ô latu rittu rô Pathri
ri tannu sutt'òcielu è ffesta
e ppi nnui nta-ll'armu
èni
u juòrnu râ Pasqua santa ri Risurrizzioni.*